

حور: ايوه ياهبتي كل يوم دروس دروس أنا طهقت امتي
ثانوية عامة دي تخلص بقا وأعيش عيشة سكر والله

هبة: كل تعب بتتعبيه بيتسجل عند ربنا يا حبيبتي

حور : يعني أنتِ شايقة إن لو ذاكرنا ربنا هيكرمنا؟

هبة: انتي بتسألني سؤال غير منطقي بالمره إنه يتسأل والله
ايه العبط ده يعني انتي مش عارفه أن ربنا قال "وأن ليس
للإنسان إلا ماسعى"!

حور: أكيد مش قصدي أقلل من ثقتي في ربنا ولكن أنا بتكلم
على الغش اللي بيكون كل سنة واللي بيغش هو اللي بيوصل
واللي بيذاكر مش بيوصل لحاجه

هبة: وده مين اللي قالك الفكرة دي؟

حور: انا سألت كثير من الدفعة اللي فاتت تعبوا وذاكروا من مصادر كثير وعملوا كل حاجه ونزلوا دروس كثير وف الآخر ايه؟ ماحدث راح كلية بيتمناها

هبة : مش يمكن انت بتروحي للأشخاص الغلط؟ اللي بيشكروا في مذاكرتهم ومايقارنوش نفسهم بالأحسن

حور: بمعنى ؟

هبة: بمعنى أن ربنا بيدي كل واحد على قد مذاكرته وتعبه ويقينه في كرم ربنا مش بكمية الأسئلة اللي حلوها ايه المغزى من حل أسئلة بدون تركيز اصلاً ومش بكمية الدروس اللي نزلها وبجانب كل ده لازم تكون علاقته بربنا وأهله كويسة

حور: بس تفكير الأهالي أنه ازاي يعني ينزل دروس ومايجيبش مجموع

هبة: حبيبتي انتي ممكن تاخدي ال ٧ مواد أونلاين وماتنزليش
ولا تدفعي جنيه ولا تكلفي أهلك بس تسمعي الدرس بتركيز
وتحلي عليه بتركيز وتجيبي ملخصات وكتب مراجعه وتحلي
امتحانات ف الآخر توصلي لحلمك

العبرة بالكيف لا بالكم  ربنا مش هيضيع تعبنا أنا واثقه
من ده وهنوصل سوا

حور: فكرة برضو انا زهقت من كتر النزول هحول اونلاين بس
البت رنوش مهونة عليا الدروس برضو بأكلنا سوا بعد كل
درس

هبة : طب يلا يالمضة خلصتيلي الرصيد زمانك وصلتي السنتر
واحنا بنرغي

حور:حقيقي مالقيتش ونس للعمر أحسن منك ورغم أننا قد
بعض ونفس السنة المتعبة إلا انك لما بتتصحيني بتتقمصي
شخصية إنك أكبر مني وعندك قدرة إقناع ، هایل بجد يافنان

هبة: حبيبي حبيبي والله لولا المسافات كنا ذاكرنا كله سوا
وعدينا الصعب □

حور: رغم خوفي بس حاسة إن ربنا مش هيخذلنا لأجل أهلنا

هبة: ماتقديش أنتِ تتمرقي فيس وواتس وانعزلي شويه باقي
شهر خلاص هانت

حور: يوه بقا ماتفكرينيش

هبة: ماأفكر كيش ازاي يعني ده مستقبلنا يا حبيبي وكل ده ينفع
نتمرق عليه بعدين بس هندم أوي على كل لحظة بنضيعها
دلوقتي ونيجي بعدين نقول ماوصلناش

اللي بيوصل مش بيضيع اي وقت وأي فرصه مذاكره تيجي
قدامه

حور: حاضر يعيوني

هبة: يلاف رعاية الله 

دخلت حور الدرس وحاولت تركز علشان ماتكونش بتضيع فلوس أهلها على الفاضي وإن تركيزها دور من أدوارها في السعي

المدرس: وبكده ياشباب دي تكون آخر حصة وإن شاء الله نتقابل ليلة الامتحان ركزوا كويس الأيام اللي جايه وربنا مش هيضيع تعبكم مالكمش علاقة بمجاميع وتنسيق الدفعات اللي فاتت اللي بيقولولكم مش هتوصلوا.

الفترة دي أنت محتاج كل الدعم والإنعزال وتبعد عن أي احباط ومشتتات وياريت نلغي الفون ده ونستبدله بفون فيه يوتيوب ومنصات بس علشان مانندمش بعدين .

وعلى فكره درجاتكم في امتحاناتي مش مقياس نهائي علشان كنتو بتعيطوا حبيت أقولكم درجات الفاينال مالهاش علاقة وتقدرنا توصلوا بمجرد اجتهادكم جامد جمودة آخر شهر ده حتى لو ضايعين من أول السنة شوفوا ايه اللي ناقصكم في كل ماده وافهموه.

الساعه اللي بتضيعها ف اليوم هتفرق معاك جوا الامتحان
وهتشوف ده كويس
واستودعكم الله الذي لا تضيع ودائعه

البنات بعد ماخرجوا من الدرس

حور: والله مستر محمد ده كلامه ده حافظ لينا ربنا يباركله

نور: ايوة يابنتي مش زي البني ادم التاني اللي كل مايشوفنا
يقولنا هتسقطوا بمستواكم ده

حور: طب ايه مش قولتلكم حرام نغتاب حد يابناويتي

نور: ياستي هو احنا بس اللي بنشتمه ما هو اللي أسلوبه زباله

كاميليا: مش معنى أن غيرنا بيعمل الحرام يبقى ده حلال ليه
مانكونش الصالحين وسط ألف جاهلين لدين ربنا؟ ليه مانبدأش
احنا

ياسمين: عندك حق انتي صح ومن النهارده هحاول ما أنمّش
على حد تاني وهخلص النية لربنا بأنه يوفقتي في الامتحانات
وإني هستمر في إني ما أعصيش ربنا مهما كانت النتيجة

حور: طب والله انتو صحبة زي السكر يلا بينا ع بيوتنا علشان
نصلي الظهر وننام شويه ونصحى نذاكر كل اللي اخدناه ده
ونبدا من بكرة نراجع ونجهز جداولنا

ياسمين: ننام؟ ننام ازاي هما اللي في ثانوية بينامو؟

حور: حبيبتي انت بتقولي ايه انت لازم تنامي من ٦ ل ٨
ساعات متواصل ولو هتاخدي قيلولة ساعة ساعتين مفيش أي
مشكله كده كده خلصنا دروس اهو وهيتبقى في يومنا ١٤
ساعة غير النوم منهم ٤ صلاة واكل ومرقعه وقعاد مع أهلنا

علشان ماتحسش أننا مضغوطين و ١٠ مذاكرة متقسمين على مدار اليوم كده احنا فل الفل

بس نذاكر ال ١٠ بس

نور: شايفين العقل شايفين

حور: ربنا يخليني ليكم كده ع طول

بعد ٣ اسابيع وباقي اسبوع على الامتحانات

هبة: أنا خايفه أوي يلا نذاكر كتير

حور: أنا فاقدته الشغف مش قادره

هبة: يابنتي مش وقته ده استعيني بالله واقراي يس وادعي قبل المذاكرة ويلا

حور: حاضر يلا بينا

بعد مرور نص ساعة في أماكن مختلفة وبلاد مختلفة
هبة لنفسها : لسه باقيلي كتير لازم ما أنامش غير لما اخلص
كل ده علشان ارتاح نفسيا

حور لنفسها : انا هقرأ الرواية دي واذكر بعدين

بعد مرور نص ساعه ثاني
حور لنفسها: الله دي جميله لازم اكملها وأشوف هيحصل ايه
لأبطال الرواية دي

هبة: هانت واخلص الماده دي وارتاح منها وابدأ احل امتحانات
ساعدني يارب

بعد ساعتين

حور لنفسها: ايه ده الساعة ١٢؟؟ لا لازم انام وهبدا من بكره
اذكر جامد واستمرت هكذا كل يوم بعد نص ساعه مذاكره
تضيع ساعتين وكانت بتصلي وتقرأ قران وتصلي قيام الليل
وتقول الأذكار

وهبة كانت بتذاكر ساعتين بينهم نص ساعه بريك صلاه
وادعيه وكانت هي كمان بتقول الاذكار وتصلي قيام الليل

ولكن يوم النتيجة هل يستويان مثلاً. !!؟

هبة جابت ٩٥ وحقت حلمها ودخلت الكلية اللي بتتمناها
وحور كانت بتعيط علشان مجموعها ماوصلهاش لحلمها

ده يعلمنا أن كل وقت بنضيعه بنتحاسب عليه يوم الامتحان 

حور بعياط : يعني ايه اجيب ٧٥ %

بعدين افكرت مرقعتها

يارب أنا عارفة إنني قصرت وراضية

وراضية بقضائك في التنسيق والكلية اللي هتختار هالي هدخلها

هنستفاد ايه بعد عياطنا الكثير؟ سواء بعد كل امتحان غير أننا
هنضيع مذاكرتنا للمادة اللي بعدها ولو بعد النتيجة ف ده قضاء
وقدر واللي حصل مش هنقدر نغيره لازم نرضى باللي جاي
وبكل المكتوب وافتكر أن ربنا بيختارك المجال الخير ليك واللي
هتقدر تشتغل فيه كويس وتحقق ذاتك ويمكن ده سبب أنك
ماتجيبش المجموع اللي نفسك فيه ده غير إنك ممكن قصرت
شويه

كل واحدة منهم دخلت الكلية اللي تنسيقها جابها ودخلوا الاتنين
نفس الجامعة باختلاف الكليات

أول أسبوع كلية

حور لهبة بعياط: انا تايهه اوي ايه ده الكلية طلعت أصعب
كثير

هبة: مش ده اللي كنت بتقولي اخلص بس ثانوي ونرتاح

حور: كان ينقطع لساني فتفوته فتفوته رجعوني لثانوي بالله
انا عيلة

خلص الترم الاول وجابوا تقديرات كويسة

حور: انا عارفه أن الترم الثاني جه وهمارس هواياتي المفضلة
وهما الجري للسكاشن والصيد

هبة : كويس ٣١ نك عارفه نفسك

حور: أنت زهقتي مني أنت كمان؟ اصلا اصلا الاهتمام
ماييتطلبش

اخر الترم الثاني

هبة: ده جدول الفاينل بتاع الترم الثاني نزل

حور: وعندنا برضو نزل .عايزه اتجوز والله أو انتحر اصل
فكرت فيها مالقيتش حل تالت مش معقوله كائن كتكوت زيي
يلحق يلم كل المواد دي دي دوامه هتستمر . ٥٠ يوم ليه يعني
ليه شفوي ونظري وعملي

هبة: وعملي النظري ونظري العملي ومرار يختايبي

حور: المهم شوفيلي زوج صالح على بكره كده اصل كده كده
مش هتخرج من غير بوكيه التخرج

هبة: حاضر إن شاء الله اتخمني وبكره ننزل ندور على عريس
في الشارع هي كل زنقة كده هتقرفيني

بعد مرور سنتين وكانو ف بدايه سنه رابعه

(بسرع ف الأحداث علشان لو مشيت بالتفاصيل هتزهقوا مني
وهقلبها لكم روايه مش هعرف اخلصها تاني من كتر الأحداث
ده غير أن طاقتي يادوب 😂👤)

ام حور: حور

انتِ يازفتة

حور: نعم ياتور عيون الزفتة

ام حور: اهو ده اللي فالحين فيه لسان قد كده

حور: خير يا امي ادخليلي ف الموضوع اصل مش فاضية بذاكر

ام حور: بتذاكري اه ع أساس اني مش عارفه مرقعتك

حور: مشكلتك انك فاهماني ياست الكل والله

ام حور: لمضة
المهم في عريس اتعمى ف نظره عاوزه يتقدمك

حور: بتهز اااااري؟

ام حور وهي بترمي الشبشب : وههزر مع أشكالك ليه

حور: آه يا ماما ماتاخدي وتدي كده معايا الاله

ام حور: صعبان عليا

حور: هو مين ياغالية

ام حور: اللي أمه داعية عليه ده

حور: ده تمنى نجمة ف أعطاه الله قمر والله

ام حور: المهم اقولهم يجو امتي البيزنيس ومان بتاعتنا فاضية.
امتي

حور: هتصل على السكيرتارية اشوف مواعيد شغلي وافكر
ياحجه

ام حور: شغلك ؟

حور: مانتني يماما اللي بتسألني أسئلة غريبه يجو فين مانتني
عارفه أن بنتك حبيبتك مش هتاخذ خطوة زي دي غير بعد
ماتخلص الكلية والماجستير والدكتوراه وال..

الاب: هو ده الصح يابنتي تربيتي

ام حور: هو ترم اللي قاعدك وبعدها تمشي وتهوينا ياريت

حور: أنا قاعدة ع قلبكم؟ لا اله الا الله

ام حور: هقولهم يجوا الاسبوع ده بما إنك في اجازة ولو حصل
نصيب اتخطبوا بعد ما يخلص الترم الجاي

حور: ثانية بس مين اللي يجي هو أنتِ قولتيلي مين اصلا ولا
ادتيني فرصة اسأل

ام حور: أكرم ابن خالك

حور: نعم؟؟

ام حور: اه والله زي ما بقولك كده

حور: طب انا هدخل اصلي استخاره واحكي لهبهوبه وبعدين
نشوف الحوار ده

.... بعد مرور يومين صحيت حور لقيت مامتها بتتصرف
وبتقولها قومي ساعديني

حور: خير ياماما ايه حملة النضافة المفاجئة دي

ام حور: خالك جاي النهارده ياختي

حور: وانتى لسة فاكره تقوليلى دلوقتي مش قولتيلي اسبوع

ام حور: عارفاكي يعني مش هتعملي فيها سندريلا ف اللبس
ده أن ماظعتيلهوش بالاسدال ده انتى فقر

حور: مش للدرجادي يعني هلبس عباية من بتوعك عادي

ام حور: بت غوري من وشي على الصبح
ولا اقولك هاتي حضن ياعروستي

حور: ايوه هي دي أمي الحنونه حبييتي

حور: ميكاب؟ ليه أن شاء الله هو جوزي علشان يشوفني
متزينة بميكاب!!

ام حور: عنك ماحطيتي

حور: احسن برضو اروح البس

لبست حور دريس خروج سيمبل. خالص عادي ولفت طرحتها
وماحطتش اي ميكب وخرجت وكانت زي القمر الصراحة والله

ام حور: اهلا يا حبيبي تعالى اتفضل

أكرم: ازيك ياعمتمو عاملة ايه

ام حور: بخير الحمد لله اتفضلو تعالو في الصالون

أبو أكرم: عاملة ايه يا حبيبتي

أم حور : الحمد لله بخير يا حبيبي انتو عاملين ايه

أم أكرم: بخير يا حبيبتي كلنا بخير وهنكون بخير أكثر بعد
النهاردة إن شاء الله

ابو اكرم: يشرفنا أن احنا نطلب ايد حور بنتي لأكرم والحقيقة
أكرم عاوز ياخذ الخطوه دي من اربع سنين بس انا رافض
علشان دراستها لأنني بعترها بنتي وعارف مصلحتها كويس

أم حور: والله يا حبيبي هي اصلا رافضه فكره الجواز غير بعد
ماتخلص كل حاجه تخص دراستها بس وافقت على الرؤية
الشرعية علشان ماتبقاش ظلمت أكرم وعلشان احنا أهل لكن
ممكن باقي الخطوات نأجلها شوية

أبو أكرم (اخو أم حور): هو ده الصح ياأختي. امال فين
عروستنا

أم حور: تعالیٰ یا حور

حور دخلت وفي أيدها صينية قهوه حطتها على ترابيزة وسلمت على خالها وحضنته وجت عند أكرم شاورتله من بعيد لانه عارف كدا كدا أنها مش بتسلم وسلمت على مرات خالها وقعدت جنبها

مرات خالها: عاملة ايه يا عمري طمني عنك اخبار دراستك

حور: الحمد لله بخير ياطنط دعواتك اعدى الوقت اللي فاضل على خير

أكرم: ربنا معاك هتعدى

حور في سرها: انت حد وجهك كلام اصلا؟

حور: آمين

أبو أكرم: طب ايه نسيب عرساننا لوحدهم شويه

حور: خالو خليك معانا وخذ قهوتك معاك بس اه سيب الفنجان
اللي جنبه معلقه

ابو اكرم: اشمعنا يابنتي

حور: اصل سكرها زياده لأكرم وبصت بطرف عينها وضحكت

أكرم : لا يابابا روح اقعد مع اختك ومراتك وعمي يلا اتفضل
انت صح

حور: ياسلام

كانو هما خرجوا وهو خاف يقوم من مكانه عمله مناخه ف
قعد وسكت

أكرم: ياسلامين

حور: اتفضل

أكرم: هو ايه اللي اتفضل انت محسساني اني واحد جاي
صالونات هعرفك بنفسي مستتياني اقولك اني مسلم و مهندس
وعندي ٢٥ سنة ولا ايه

حور: مبدأيا اسمها مصونات ثانياً ماهو يعتبر كده برضو ، لا
اكيد دي حاجات عارفاها نينيني ثالثاً اتفضل قهوتك قبل ماتبرد
رابعاً ايه مهندس دي ديانة جديده ولا ايه

أكرم: ايه ده انتي بتهزري زي البني ادمين؟

حور: انا غلطانة والله غلطانة

أكرم : لا خلاص والله بس اصل يعني من لما بطلتني تلعبني معانا
ف الشارع و عملتي نفسك كبرتي علينا ياهانم ودخلتني جامعته
وبطلتني تسلمي علينا بالأيد ومابقاش لينا كلام نهائي مع بعض
اعتقد اخر مره قعدنا سوا كان وقت ثانوي لما كنت بحكيك
تجربتي ف ثانوي و حقيقي نسيت اقولك وقتها اني فخور. بيكي
و بمجموعك و بكل تعبك و بأي حاجه بتعملها

حور: شكراً

أكرم: ده اللي قدرك عليه ربنا

حور: اه 😊

أكرم : طب بعيداً عن سماجتك واني حاسس ان الموضوع مش
على هواك

حور: ليه بتقول كده

أكرم: يمكن علشان مش حاسك طايقاني

حور: بالعكس والله انا بس بتعامل معاك كده علشان انت لسة
اجنبي عني

أكرم: انا مصري وابويا مصري

حور ضحكت بس بعدين عملت نفسها مش بتضحك وقالتله خفة
الدم مش بالعافية

أكرم: انا بس عايز اعرف اذا كان في امل اكون مش اجنبي ولا
لا

حور ابتسمت: يعني امل صغنون وعلى حسب اسلوبك وطباعك
وتسهيلات ربنا واسألتي ليك هيتحدد باقي الامل
وطبعا مفروض تعرف أن لو حصل نصيب اكيد كل ده هيكون
ف وجود ضوابط خطوبة

أكرم ابتسم جامد: طب الحمد لله انا كنت خايف مايكونش في
اي امل ويكون في حد تاني احسن مني

حور: اكيد مش هلاقي احسن منك ياأكرم
بعدين استوعبت اللي قالتة وسكتت وبصت ف الارض

وهو بص على كسوفها ومارضيش يعلق علشان مايحرجهاش
وضحك وشرب من القهوة

اكرم:تسلم ايدك القهوة جميلة

حور بصتله باستغراب

اكرم: انتي فاكراه يعني لما تحطيلي فيها ملح هسيبها؟ لا
هشربها علشان اثبتك حبي، حركات الأتراك دي عارفها

حور: ده انا كنت بطفشك بشياكة!!

أكرم: لا متخافيش قاعد على قلبك

بعدين تليفونها كان بيرن فيديو كول وكانت هبة

أكرم: ده مين قاطع اللحظات السعيدة ده

حور : هبة صاحبتني وهرد سواء برضاك او لا

أكرم: شكرا على كرمك والله يابنتي واخلاقك واحترامك

حور: الله يسترك ايوه ياهبهوب .. مش حاطه هاند فري ف
اتظبطي ف الكلام

أكرم: لا عادي انا مش غريب انا جوزك

حور: ماشاء الله اتجوزتني امتي

أكرم: من ابتدائي

هبة: جواز باطل ده خلي بالك لأنها صغيره

أكرم: ايه خفه الدم دي

هبة: بس ايه الدريس العسل ده يا حوري سكر ياعيونى

أكرم: معلىش بس هي حوري انا

هبة: ابتدينا ناقر ونقير

حور: هقفل ف وشك وانت هطلع واسيبك

أكرم: لا استنى بس يا حور في كلام كثير كنت هقولهوك بس
نقول ايه ف قاطع اللحظات السعيده

هبة: ده احنا نسمي العيال بقا ايه رأيك يابت يا حور تسميها
هبة

حور: لا ماهي مش ناقصه اتنين الحكايه كفاية واحده

أكرم: نسميها روح علشان اقولها روي ولو ولد نوح وكمان
روح و حور هتبقى حاجة سكر كده وهي اصلا امهم حوريتي

هبة: وتبقى البنت روح اكرم وهي أم روح

حور: لا ايه أم روح ده بيئه اوي انا هسمي مثلا يزن لو ولد
ولو بنت أيسل

هبة: امال فين. دراستي ثم دراستي ولا لما كل زنقه امتحانات
تقعدني. تقولي جوزوني ودلوقتي رافضه علشان مستقبلك اللي
بتعطي منه وانتي اصلا عندك انفصام

حور: ايوه صح دراستي ثم دراستي انتو خلتوني اندمج ف
الكلام ونسيت نفسي منكم لله بجد

أكرم: يعني مش كنتي ام يزن من شوية؟

حور: ماتدخلنيش ف تفاصيل دلوقتي انا اصلا لما سرحتت ف
الكلام مع هبة نسيت وجودك

أكرم : للدرجادي غيابي سهل

هبة: خف صعبايات على البت

أكرم: طب ايه رأيك تقفلي انتي علشان اتكلم مع مراتي في
حياتنا اللي جايه

هبة: يعني أنا العزول؟

أكرم: ايوا بالظبط كده

هبة : طب يخويا كده كده هي هتحكيلي كل حاجه

أكرم: أن شاء الله وalf الف مبروك

حور: مش هنخلص ام الليلة دي؟

هبة: لا يختي انا ماشية اهو

اكرم: نفسي

هبة بتقول حاجة؟

اكرم: بقول بحب ميسي

هبة: اه بحسب

اكرم : لا ماتحسبيش

هبة: يلا باي يا حوري اكلمك بعد ما الناس اللي عندك دول يمشو
وضحكت وقفلت

اكرم: الناس اللي عندك؟

حور: خلاص بقا

اكرم: صبر

حور: لو مش مستحمل غلاسة هبة صاحبتني يبقى مش
هتستحملني خلي بالك

اكرم: هبة ايه بس انا لسه شارب فنجان قهوة فيه طن ملح لما
بطني هتموتني وصابر اسكتي خالص

حور: واحنا صغيرين انت ماكنتش بتحب القهوة اصلا!

أكرم: مين قال اني بحبها شربتها علشان من ايدك وياريتني
ماشربت والله

حور: يعني كده؟

أكرم: ده انا بقولك تسلم ايدك ايه القهوة القمر دي

حور: نيينيني

أكرم: بقولك صح

حور: قول

أكرم: فاكرة لما الحزن صابني

حور: لا والله؟ والوجع غَيْر في شكك ولا ايه

أكرم: لا بتكلم بجد والله لما كنا صغيرين ف ابتدائي كده وكنا بنروح المدرسة سوا وماكنتش مصاحب حد هناك غيرك ووقعت من السلم واتكسرت وفضلتي تعيطي؟

حور: لما قعدت تقولي ماتعيطيش انا بخير اهدي ؟
لا مش فاكراه خالص

أكرم: ياشيخه؟؟

حور: المهم يعني أنجز

أكرم: وقتها روحتي جيبتي تليفون المدير ورنيتي على باباكي
جه اخدني مستشفى ودي احسن مره حد وقف فيها جنبني

حور: امال يعني كنت هعمل ايه ده انت غريب وده موقف عادي

أكرم: يمكن عادي بالنسبة لك علشان انا عادي بالنسبة لك لكن
مش عادي بالنسبة لي علشان انتي مش عادية بالنسبة لي

حور: ايه جو أرنبنا في منور انور ده دماغني لفت

أكرم: حور والله انتي هتشليني

حور: ده المطلوب

أكرم: !!!؟؟؟

طب قومي هاتيلي مياه علشان حاسس الملح بيجري ف معدتي

حور: ايه قومي هاتيلي دي بعدين المياه قدامك

أكرم: والله انا بس اكتب الكتاب وهقطعك لسانك ده

حور: مالك فاكِر نفسك توم كروز كده ليه

أكرم: مين ده كمان

حور: مش عارفة هما بيقلوها كده

أكرم: ياالله ياولي الصابرين صبرني

حور: ويصبرني

حور: بص مبدأيا لو انت جاي تتجوزني بناء على شخصيتي
وانا صغيره ف أنا اتغيرت تماماً يعني مثلاً عندي عصبية
مااعتقدش انك هتستحملها وكمان تلقائيه في الكلام بطريقة
عبيطه ودبش زي مانت شايف يعني ودي حاجات مش بايدي

أكرم: مين قال اني مش عارف كل حاجه عنك خطوة بخطوة!؟

حور: ده ازاي بقا

أكرم: حور انتي فاكراي جاي اطلب ايدك علشان قريبتني كده
وخلص؟؟

حور: ليه هو ف حاجه تاني؟؟

أكرم: حور انا لما كنت بخاف عليكي واحنا صغيرين واضرب
اي حد يقربلك كنت فاكرا اني بعتربك اختي عادي علشان
ماعنديش اخوات بنات وكان دايم بابا يقولي واحنا نازلين نلعب
حور حطها ف عينك دي اختك فاكراه لما كنا نيجي نلعب وتلعبني
مع اولاد غيري ف ازعق فيكي؟

حور: كنت بتقولي خالو قالك اني مالعش مع حد غيرك

أكرم: لا دي كانت غيرة من جوايا انا مالهاش علاقة بكلام بابا
ولما بقيتني في اعدادي كده وبطلتني تنزلي تلعبني معانا وكنت
اجي اخذك عمتو تقولي لا

كنا بنتقابل في المدرسة وانتى ف تالته اعدادي لأن مدرستنا كانت من ابتدائي لثانوي وبعدها ف ثانوي بابا مارضيش يخليني اجي عندكم تاني كنت أنا ف جامعة وانتى اولى ثانوي من وقتها بدأت افتقدك وحسيت أن خوفي عليكي في صغرك ماكانش حب أخوة لا وبقيت احاول احافظ عليكي مني ومااعترفش بأي حاجة علشان مااغضبش ربنا وان لما تعرفي حاجة زي كده يكون رسمي علشان ماشغلكيش عن دراستك وعلشان كلامنا هيكون حرام

حور: الكلام ده بجد؟

أكرم : امال يعني ههزر معاكي؟

حور: طب ها كمل

أكرم: من غير ماتقولي

وبس ياستي حالياً عدى سبع سنين على اليوم اللي حسيت انها
مش مجرد مشاعر وخلص وانتي خلصتي ٣ سنين ثانوي
واهو ف رابعة كلية وانا خلصت ٥ سنين هندسه وبقالي سنتين
بشتغل ومستنيكي وهفضل مستنياكي الباقي من عمري لو
عايزة

حور: انا عمري ماخطر على بالي أن يكون ف شخص بيحبني
أصلاً

أكرم: انتي تستاهلي كل الحب يا حور وتستاھلي ان الواحد يتقي
الله فيكي علشان ربنا ما يحرمش الشخص ده منك وحقيقي ليا
الشرف اني اكون الشخص ده

حور: مش عارفة ارد الحقيقه

أكرم: لا استني هكمل كلامي ده انا شايل جوايا حكاوي من
ابتدائي

حور ضحكت

أكرم: قولت لبابا من سبع سنين اني بحبك قالي حور لسه صغيره وف ثانوي وماينفعلش تعطلها وحور بنتي زي مانت ابني

قولتله يعني ايه قالي يعني مش موافق انك تروح تقولها حاجه زي دي غير لما تروح تتقدم رسمي وتكون قد ده وتكون بتشتغل ومعاك فلوسك تبني بيها بيتك بنفسك ولما قولتله يابابا ده مجرد اعتراف علشان ماحدش ياخذها مني قالي ماتخافش حور مش هتاخذ خطوه زي دي وهي صغيره

ولما نجحتي ف الثانوي ودخلتي جامعه قولتله تاني وقالي لما تخلص انت كليتك وبس ياستي يوم ماجينا نباركلك واجهت عمتي وقالتلي انك رافضه خطوبة ف السن ده وامي كانت عارفه وباباكي وأمة لا اله الا الله كانت عارفه الا انتي وانا كنت متفق مع باباكي يرفض. العرسان من غير مايرجعك لغايه ماكون كونت نفسي يعني مرفوضك بتاع ٧ عرسان وكل مره فيهم كنت بتغاظ اكثر لغاية ماشوفت أنه كفايا انتظار كده

حور باستفزاز : ياسلام افرض كنت حابة اوافق على حد فيهم

اكرم وهو بيمثل الهدوء: توافقي ازاي يعني مش فاهم

حور بخوف: لا ابدأ بكح كمل يلا

أكرم: سلامتك يختي من الكحة

حور: الله يسلمك والله

أكرم: بس بقا خلتي افضل عن الحوارات اللي كنت بحكيها

حور: كمل كمل خرينا نسمع

أكرم: هكمل علشان انا مش جاي غير علشان احكي

حور: استغفر الله العظيم

أكرم: من كل ذنب

حور: طب ايه والله اطلع بره

أكرم: لا خلاص

بس ياستي وطول السبع سنين دول كنت بسأل عمي عنك دايمًا
وكنت بعرف كل مره بتتعبني فيها من عمتي لما كانت تقول
لبابا وكنت بقوم اصلي ركعتين قضاء الحاجة بنية شفاءك وكنت
ببقي حزين اوي والله وعارفة اكونت الفيس الفيك اللي عملتيه
علشان ماحدث يعرفه ؟

حور: بجد مبسوطه اوي

ماله اكونت الفيس ده كمان انت عرفته؟؟

أكرم: ظهرتيلي مره صدفه وبعدين عرفت أنه انتي وكنت عامل
فولو وع فكره ف شوية ولاد بيقدو يعملو رياكتات همسحك
الاكونت خالص بس استني

حور: ثانيه بس ده انا مش بشوف مين بيعمل ريكاتات اصلا
بعدين ف الفريندس مش عندي غير بنات ومش محتاجه أكدلك
على حوار زي ده يعني

أكرم: اقصد الفولورز

حور: اه ده طبيعي لان الاكونت بابلك

أكرم: هنشوف الاكونت ده بعدين

حور: سيبك انت عرفت ازاي الاكونت ده ماحدث من العيلة
يعرفه

أكرم: ماانا بقولك اهو ظهرلي والله وكنت بقرأ اسكريبتاتك على
انك واحده غريبة عادي ومره لقيت اسمك مكتوب ثلاثي عرفتك
بقا ولزقت هناك وانا اللي كنت ببعثلك مسجات على صراحة
على فكره

حور: انهي مسج فيهم

أكرم: كل المسجات اللي كنتي بتنزليها ومش عارفه مين صاحبها وكنت بتابع ف صمت تام وكنت بحب خواطرك وكتاباتك اوي وفخور بيكي وبكل انجازاتك حقيقي

حور: أنا ممتنة ليك بجد ده انا كنت افكر أن محدش يعرفني ولا حد معبرني

طب لو هنتكلم من ناحية البيت اللي هنعيش فيه هو خالي بنى ليك شقه فوق شقته ولا ايه النظام

أكرم: انا كنت شايف ليكي يعني من خمس سنين بوست انك مش عايزه تسكني ف بيت عيلة

حور: ده انت متابع فعلاً بقا

أكرم: عيب عليكي وحوار انك رافضة جواز القرابين ده عملت
نفسى ماشفتهوش انتي كمان انسى الحوار ده وهحقلك باقى
احلامك

حور: خلاص نعتبرك غريب علشان بحب خالو بس

أكرم: إن شاء الله اكون مكان خالك

حور: ازاي يعني

أكرم: انتي غيبه ومش بتفهمي تلميحات وهتتعبيني

حور: شكراً لذوقك ياغالي

أكرم: المهم أن بابا كان معاه ارض ف حته بعيدة خالص عننا
وعنكم واداهالي هديه واتفقت مع الناس اللي هتبنى بس
مارضيتش احط فيها طوبه غير لما اجي اتقدملك

حور: هو انت كمان عارف اني عاوزه اختار نظام بيتي بنفسي
والبلكونات والبناء وكده؟

أكرم: بقولك متابعك من سنين وعارف كل حاجة وكمان يعني
صاحبى اخو صاحبك كنت بخليه يعرف منه معلومات كتير عن
احلامك المستقبلية ف الجواز

حور: صاحبتي مين ثانيه بس!!

أكرم: نور

حور: ماشي يانور لما اشوفك

أكرم: هي كانت عارفه وكل اصحابك عارفين

حور: ماشاء الله ده انا اخر من يعلم جدًا

أكرم: انتي اخر من يعلم فعلاً

المهم يا حوري في حاجات في جروبات ادوات منزلية وبوستات عند فاطمة البري كنت بشوفك عامله عليها ريكاتات هناك كل الحاجات دي مشتريهاك وحاططهاك ف اوضتي واول مرتب اخدته لما اشتغلت وانا طالب ف سنة تانية جامعة اشتريتلك بيه بوكس كُتب وشيلتها عندي وعامل ليكي تابلوه كبير بتاني مرتب ليا وتالت مرتب حوشته على مرتب باقي الشهور لغاية ماوصلت رابعة كلية واشتريتلك بيه ايفون ١٣

اللي كان نفسك فيه وقتها

واخر سنتين كلية مرتبهم من الشغل اللي كنت بشتغله حوشته للجواز

وأنا ياستي كنت بشتغل ف صيدليه بالليل بجانب اسيستنت اونلاين وبالنهار ف الكليه وكنت بحاول أوفق بين الدراسة والشغل علشان اجمع فلوس تكفيني واحوش منها علشان ابني بيتي بنفسي وحالياً بعد سنتين تخرج شغال مهندس بجانب شغل تاني اونلاين والحمد لله قدرت اجمع فلوس الشبكة والأجهزه خلال شغل السنين اللي فاتت والباقي بابا هيساعدني فيه بس ياستي دي حدوتي ها

حور وهي بتمسح دموعها: بجد انا اللي فخورة جدا بكل حاجه عملتها علشانى ومش عارفه اشكرك ازاي بس انا مش محتاجه شبكة خاتم واحد يكفيني بجد ومعاه دبلة وقل كده وباقي الفلوس نجهز بيها بيتنا وبعد الجواز هستنى منك الشبكة عادي

أكرم: لا طبعاً مافيش الكلام ده بس ثانية افهم من كده انك موافقه؟

حور: لا مين قال كده هصلي استخاره الاول وأشوف رأي بابا

أكرم: عمتي قالتلي أن بقالك ٣ ايام بتصلي استخاره دي حاجه تاني حاجه باباكي عارف كل حاجه اصلا

حور: لا برضو هفكر

أكرم: طب فكري مع نفسك .. ياعمي يابابا ياماما

أبو أكرم دخل: في ايه يابني

أكرم: حور موافقة

حور: ثانية والله ماانا قولت كده

أكرم: دي لسه قايلالي حالاً ماقدرش اعيش من غيرك

حور: انا؟؟ والله ماحصل

ام حور: لا دي آخرها تقولك اطلع بره دي مش بتاعة الكلام
ده

حور: أمي حبييتي

أبو حور: ايوه يعني اتفقتوا على ايه

أكرم: أنا بقول نجيب المأذون بكره علشان الساعه عشره زمانه
نايم

حور: مأذون ايه أنت كمان يابابا قول حاجه

أبو حور: هو بيتكلم صح

أم حور: تعبتي الواد معاكي ياشيخه

أم اكرم: انا من رأيي نجيبه بكره برضو

حور: لا والله كلكم عليا؟؟؟

طب على فكره لازم فتره خطوبه علشان نتعرف على بعض

أكرم: نتعرف على بعض ايه انا بقالي ثلاث ساعات بحكيك
قصه حياتي قال نتعرف على بعض عايزه تعرفي ايه اكثر من
كده

اه نسيت أقولك مواعيد نومي ومواعيد أكلي دي الحاجه
الوحيدة اللي ناقصه

حور: مش وقت استظراف خالص ياخفة

أكرم: انا اللي بستظرف؟

خطوبة ايه ولسه هنعمل ضوابط خطوبة واجي ارن عليكي
ماترديش ولما اجيلك الكلية تعملي نفسك ماتعرفنيش طب ليه
ان شاء الله مالحننا نكتب الكتاب ونتجوز بعد ماتخلصي كليتك
وتاخدي دبلومتك وف الفتره دي هنكون كاتبين كتابنا ونخرج
سوا عادي ونتكلم براحتنا ونبني بيتنا بنفسنا خلال السنين دول
ونخلص كل الأجهزه وكل حاجه

حور: لو فاكرا اني هقتنع ف أنا فعلا اقتنعت بس ليه الشك

أكرم : تحياتي من غير التاء والله مش عارف ازاي كنتي
عايزاني أعيش حياتي وعمتي مش حماتي

حور: انا هاخذك علشان كريبتيق بس مش اكر

أكرم: يعني مش علشان عجبك تفكيري؟

حور: توتو

ابو اكرم: طب نحن هنا طيب مفيش احترام

أكرم: اكتب الكتاب وماحدش هيقولي تلت التلاته كام بس الصبر

أم اكرم: لما نروح البيت بس

ام حور: ها يبنتي موافقه أن كتب الكتاب يكون ف اجازة الترم
الاول والفرح بعد سنتين؟

حور: تمام ياماما اللي تشوفيه

أكرم: دلوقتي تمام ياماما اللي تشوفيه؟ بس ثانيه كتب كتاب
ايه اللي ف الاجازه انا لسه هستنى شهرين

حور: مش احسن ماتستنى سنتين؟ ع الأقل اجيب دريس كتب
الكتاب

أكرم: ليه انتي فاكره نفسك هتعمليه ف قاعه وافرج الناس
علينا واحنا بنرقص يعني ولا ايه

حور: اصلا كنت هعمل كتب كتاب اسلامي والفرح هستبدله
بعمره ليه ادفع ١٠٠ الف ف قاعه على كام ساعة ماندفع حاجة
بسيطة عليهم ونسافر سوا عمرة اخر رمضان وكأنها
حج 

أكرم: اتنين بس احنا واحد وافكار واحده والله

أبو حور: هتاخدوني معاكم ياولاد صح

أكرم: هات فلوس وتعالى ياعمي

أبو حور: اصيل ياابو رحاب اصيل

أكرم: لا عيب عليك ياعمي ده أنا أبو الأصول

أبو حور: واضح ايوه هتقولي

المهم اتفقو كتب الكتاب امتي وبعد كتب الكتاب جهزو بيتكم
وشبكتكم وكل حاجتكم ومفيش كلام تليفونات ولا خروجات ولا
حتى تيجي هنا لغايه كتب الكتاب

أكرم: ينفع نكتب الكتاب دلوقتي

حور: وده علشان ايه أن شاء الله؟

أكرم: علشان خاطري يعني هيكون علشان ايه

أبو أكرم: اللي خلاك تصبر سبع سنين قادر يخليك تصبر كام شهر كمان

حور: على رأيك ياخالو قوله

أكرم: هيقولي حاضر ياختي هيقولي وهصبر سنين مش شهر

حور: يعني مثلا هاجي كام مره في بالك في الشهر دي

أكرم: هي مرة واحده

حور: ياراجل!؟؟

أكرم: علشان انتي جيتي مره ومامشيتيش من ساعتها

حور: مشكلتك انك مش نرم ودي مشكله جميله جدًا

أكرم: وده المطلوب كده كده

حور: المهم يعني هتعملي مكتبة في البيت واوضة خاصه
بالمكتبة دي وركن صلاة؟

أكرم: اعتبريهم اتعملوا

حور: اهو هو ده اللي هيصوننا ياقلبي والله

أبو حور: خلاص يبقى كتب الكتاب تاني اخر يوم امتحانات
لحور
الترم ده

أكرم: بوسة لعمي الجدع

ابو حور: الف مبروك يا حبايبي

حور وهي بتحضن باباها: الله يبارك فيكي يا حبايبي وشكراً لكل
حاجه عملتها علشانى 

أكرم: وانا مفيش شكراً ليا؟

حور: ممممم هفكر وضحكت
شكراً بجد علشان انا النهاردة حاسة ان كل اللي بيحصل ده
كثير عليا

أكرم : مفيش اي حاجه تكثر عليك
قولتك تستاهلي كل خير الدنيا 

تمت..